

Стихиры Рождества Богородицы на хвалитех, глас 1:

Хвалите Его во гласе трубнем, // хвалите Его во псалтири и гуслех.

О, дивнаго чудесе! / От неплодове плод возсия / мановением всех Содетеля и Вседержителя, / доблественно мирское благих разреши неплодство. / Матери с матерью Богородичною ликуйте, зовуще: / Обрадованная, радуйся, с Тобою Господь, // подай миру Тобою велию милость.

Хвалите Его в тимпане и лице, // хвалите Его во струнах и органе.

Хвалите Его в кимвалех доброгласных, хвалите Его в кимвалех восклицания. // Всякое дыхание да хвалит Господа.

Столп целомудрия одушевлен / и светлое приятелище, блистающеся благодатию, / Анна благославная явльшися, / породе забрало воистину девства, / Божественное процветение: / Яже всем девственным / и девства желающим дарование, / девства доброту яве подающую, // и дарующую всем верным велию милость.

Слава, и ныне, глас 6:

Сей день Господень, / радуйтесь, людие: / се бо Света чертог / и книга Слова Животнаго / из утробы произыде, / и Яже к востоком дверь, рождшися, / ожидает входа Святителя великаго, / едина и Единого вводящи Христа во вселенную, // во спасение душ наших.